

Gabinete Mike Eman a devela Plenchi Juan Portugues

Infraestructura nobo ta continua cu tradicion di bario

ORANJESTAD(AAN):Un ambiente di comunidad a reina diadomingo atardi,

mescos cu ta sosode pa decadanan largo, dilanti di Flor de Oriente na Playa. E

biaha aki sigur tabata extra special pa motibo cu a de-vela e borchí cu ta dedica



e Plenchi nobo na Sr. Joao de Freitas, miho conoci como Juan Portugues. Famia, empleado y amigonan di semper a bini hunto pa presencia e momento grandi aki.

Prome Minister di Aruba Mike Eman hunto cu Minister di Infraestructura Benny Sevinger y Pepi de Freitas a devela e borchí mey mey di hopi emocion y aplauso pa e reconocimiento bon mereci na un inmigrante cu despues a bira pionero pa su compatriotanan, pero tambe un figura importante den e comunidad Arubiano. Sr. Pepi de Freitas a hiba palabra den nomber di e famia indicando cu nan ta "masha gradici na gobierno cu por a otorga nos un Plenchi na nomber di nos tata."

Sr. Joao mes a construi e edificio emblematico di Flor de Oriente y tabata hopi bon conoci tanto den Rancho, Madiki, como henter e isla. Sr. de Freitas a gradici Prome Minister Mike Eman, lider di bario di Rancho Benny Sevinger y tambe Ronny Petronia cu a traha hunto cune pa hopi aña tras di bar, ademas di Etty Toppenberg pa semper trece bon ambiente cu su musica. Finalmente el a gradici su señora. E edificio ta keto bay propiedad di famia de Freitas, sin embargo, Pepi, pa motibo di salud no por sigui maneha e negoshi su mes.

Esaki awor ta na huur pero ta sigui ta un punto di encuentro pa un grupo grandi di ciudadanonan cu Sr. Benny Sevinger ta considera e conseheronan inoficial di gobierno. "Aki ta discuti politica, bida diario, asuntonan di nos pais. Di

akinan hopi idea ta sali cu ta yega Gobierno pa ehecuta. Nan ta acerca nos y bisa: 'Corda traha riba esaki esaki y wak esey' y nos ta aprecia tur e aporte aki," e Minister a bisa na tur presente. Di su banda, Prome Minister a expresa su satisfaccion di por a dedica e Plenchi aki na Joao, kende a pasa su ehempel y balornan pa su famia, pesey mes Consejo di ministronan no a pensa hopi pa aproba e peticion pa e Plenchi carga su nomber.

"Semper famia de Freitas a duna ehempel di con un famia por ta un pilar pa un sociedad cu nan solidaridad, cariño y amistad. Ora cu un famia ta asina special pa un pais, ora un hende manera Juan Portugues ta asina special pa tanto hende, no por tin duda pa dedica un lugar pa marca pa semper e contribucion aki." Den e renobacion y mehoracion di Oranjestad y Aruba en general, ta pone hopi enfasis riba un infraestructura cu no solamente ta satisface e necesidadnan practico di un poblacion, pero tambe ta brinda espacionan caminda e ciudadanonan por bini hunto pa sinta, combersa, socialisa, en fin, por combibi sanamente.

Mescos cu a sosode pa hopi aña y ta spera lo sigui pa hopi aña mas, e ocasion special di diadomingo atardi a continua den un ambiente masha agradabel caminda no a falta bon musica y combersacionnan estimulante. Gabinete Mike Eman ta felicita famia de Freitas, pero tambe comunidad di Aruba en general, cu adkision di otro luga pa un y tur disfruta di dje.